

E Guia pa Mañan

Hospital ta celebra 5 aña di curso gratis pa futuro mayornan

ORANJESTAD - Diaranson anochi Dr. Horacio E. Oduber Hospitaal a conmemora cu cinco aña pasa e departamentonan di Kraam en Verlos a cuminsa ofrece cursonan gratis pa futuro mayornan cu lo ta haciendo uzo di e servicionan y facilidadnan di hospital pa duna luz.

Renita Blindeling ta manager di cuida di e asina yama Kraam en Verlos cu ta encarga cu tur servicio relaciona na duna luz. E ta splica tocante

e curso y pakico su team a cuminsa ofrece.

Pa algun tempo e personal trahando den e departamentonan concerni a bin ta nota cu nan pashentnan tabatin e necesidad di ta miho prepara pa e yegada di nan baby. Pashentnan tabata indica esaki tambe, pues cu nan tabata hopi interesa di tin diferente informacion practico cu lo a prepara nan miho pa e yegada di nan baby na hospital. Nan tabata kier sa detayenan encuan to con pa prepara y kico

nan por spera di hospital y e personal cu ta atende cu nan y nan baby(nan), pero tambe kico e personal di Kraam en Verlos ta spera di nan pa por brinda nan e miho servicio.

Asina a nace e idea pa bin cu un anochi informativo pa futuro mayornan y asina yuda nan den con pa prepara pa duna luz na hospital. E curso a haya e nomber "E Guia pa Mañan" y ta wordo duna gratis tur luna na mamanan cu ta na estado.

Durante di e curso e mamanan na estado ta ricibi informacion tocante e embarazo y parto sin complicacion, pero tambe di e embarazo y parto cu complicacion.

Nan ta haya un splicacion di sintomanan, ki ora ta consehabel pa nan bay hospital ora cu nan tempo yega pa duna luz, con pa prepara pa bay hospital, pero tambe ki ora ta bon pa bay hospital pa un control pasobra algo kisas no ta bayendo bon cu nan embarazo.



Sra. Blindeling ta splica cu tin hopi hende cu no sa of no ta ripara ora cu cierto momento algo no ta bayendo normal y pues e mama na estado y esun cu ta compaña pa e anochi di informacion ta haya un splicacion tambe di e sintomanan di complicacion pa asina nan sa ki ora pa bay hospital pa control.

E ta agrega cu hospital kier pa e informacion yega na tur futuro mamanan, kende ta bin sea cu nan partner of cu un otro persona di nan escogencia, y p'esey ta ofrece e curso aki gratis. Renita Blindeling

ta invita tur persona interesa pa participa na e curso aki pa bishita e pagina di Facebook di hospital unda tin un lista di fecha y orario pa e anochinan di informacion.

Concluyendo, Sra. Blindeling ta desea di gradici tur orador cu ta haci e anochinan di informacion aki posibel ya pa 5 aña y alabes tambe ta desea di gradici e sponsornan, esta Christine Hintz di Manrique Capriles cu su productonan Johnson & Johnson's y Jancis Tromp di Baby Care cu su productonan Medela pa nan bon cooperacion. □

